



partii naleraq

UKA 2016/121-01

05-10-2016

**Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx xx 2016-imeersoq. (Meeqqat atuarfiat pillugu angajoqqaat nuna tamakkerlugu isumalioqatigiissitaannik pilersitsineq)**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Atuarfik pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx xx 2016-imeersoq. Meeqqat atuarfiat pillugu angajoqqaat nuna tamakkerlugu isumalioqatigiissitaannik pilersitsinissaq pillugu siunnersuut Partii Naleraq sinnerlugu imannak oqaaseqarfigissuarput:

Aallaqqaasiullugu oqaatigissuarput, meeqqat atuarfianni angajoqqaat atuartuutillit tamarmik meeqqamik atuartitaanerannut malinnaalluernerunissaat kaammattuutiginerusariaqarmat.

Tassami qanittukkut tusagassiuutitigut tusarparput, meeqqat inuusuttuaqqallu 13-iniik 18-inut ukiulli Ilulissani isumasioqatigiisinneqarmata ilaatigut meeqqat ilaannit tamanna aamma ujartorneqartoq.

Taamaammat-una aamma angajoqqaat ilaasa akisussaassuseqarnerusumik meeqqaminnut iliuseqarnerunissaat ujartorlugu ukiaq manna ataatsimiinnitsinnut oqallisissiamik siunnersuuteqartugut, tassa tamatta nalunnginnatsigu meerarpassuit inuusuttuararpassuillu angajoqqaaminniit arlalitsigut isumagineqanngippallaartut.

Kisianni taama oqareerluta aamma oqaatigissuarput, nunaqarfiit ilaanni ukiuni kingullerni angajoqqaat klasselærillu suleqatigiilluernerisigut, meeqqat peqataatillugit qaammatikkaarlutik aaqqissuusseqatigiittalersimanagerat angajoqqaanut, meeqqanut atuarfimmullu pitsaasumik kinguneqalersimasoq aamma paasitinneqarpugut, taamatullu aaqqissuusisarnert aamma inoqarfinnut allannut kaammattuutigeqqunaqaat.

Taamaammat aamma meeqqat atuarfianni suli pissutsit pitsaanerulersinniarlugit immikkut nuna tamakkerlugu angajoqqaat siunnersuisoqatigiivini pilersitsissamik siunniussaqaarneq Partii Naleraq sinnerlugu tunngaviatigut isumaqatigaarput.

Kisianni soorunami inatsisissatut siunnersuummi misissorluagassat assigiinngitsut ataatsimiititaliami sukumiisumik qulaajarneqarnissaat pisariaqassasoq isumaqarpugut.

Tassami apeqqutit assigiinngitsut siunnersuummi eqqartorneqartut sukumiisumik ataatsimiititaliami eqqartorneqartariaqarput, soorlu makkua:

Ukiut sisamakkaarlugit angajoqqaat siunnersuisoqatigiivini qinersisarnissat pillugit inatsisartunut, kommuninut, nunaqarfinni siulersuisunut, ilagiillu sinniisaannut qinersisarnerit pillugit inatsimmut sooq ilaatinneqassannginnersut ?

Angajoqqaat siunnersuisoqatigiivini qinersiviit 72-usat oqaatigineqarpoq, taakkunanilu qineqqusaarnissanut tunngasut taamaallaat qarasaasiaq atorlugu ingerlanneqartarnissaat oqaatigineqarluni.

Kommuninut, nunaqarfinni aqutsisunut ilagiillu sinniisaannut qinersisoqartillugu, angajoqqaat siunnersuisoqatigiivini ulloq taanna qinersisoqarsinnaannginnerami ? (aningaasartuutit sipaarniarlugit).

Siunnersuummi oqaaseqaatini naliginnaasuni oqaatigineqaralarpoq, kommuninut qinersisarneq iluatsillugu angajoqqaat siunnersuisoqatigiivini qinersisarnerit ingerlanneqartassasut, kisianni suliap tusarniutigineqarneranut atatillugu, oqaatigineqarpoq, kommunalbestyrelsimut qinersineq peqatigalugu siunnersuisoqatigiinnut qinersisoqartassanngitsoq.

Tassami angajoqqaanut siunnersuisoqatigiinngortussat akissarsiaqartinneqartussaapput allanillu suliqaqqusaasussaanatik.

Siulittaasoq ukiumut kr 600.000-inik aammalu ilaasortat kr. 50.000 akissarsiaqartinneqartussaapput.

Immikkut allaffeqartussaassapput, taanna sumiissanersoq suli ilisimaneqarpassinngilaq, immaqagooq atuarfiit ilaanni ?

Illumullimi ilagiit sinniisaannut taakkunatulli atugassaqaqtitsisoqarsinnaaguni qanoq ilagiinnut siuariarneq aamma annertutigissangaluarpa ?

Kisianni siunnersuummi aalajangersakkanut ataasiakkaanut nassuiaatini oqaatigineqarpoq, siunnersuisoqatigiit meeqqanut toqqaannartumik attaveqassanngitsut ?

Taamaammat aamma siunnersuisoqatigiit atuarfiit arlaani allaffeqartinneqarsinnaanerat tassuuna killilerneqapajaareerpoq.

Naggataatigut siunnersuummi piumasaqaatigineqarpoq, kikkut qinigassanngortissinnaasut, tassa soorunami angajoqqaat imaluunniit angajoqqaarsiat meeqqamik meeqqanilluunniit atuartuutillit. Tamanna aamma ajunngilaq, kisianni isumaqarpugut kulturitsinnik ilisimaarinnilluarnissaq oqaatsitsinnillu atuilluarsinnaanissaq ilanngullugu piumasaqaatigineqartariaqartoq.

Taamaammat siunnersuutip aappassaanneeraneqannginnerani ilinniartitaanermut, Kultur-imut Ilisimatusarnermut ilageeqarnermullu ataatsimiititaliami suliarineqarnissaa inassutingaarput.

Anthon Frederiksen